

Augsburg, 1. Februar 1570

An Johannes Crato von Kraffttheim

UB Breslau, Ms. 9820 (Rehdigeriana 246), Nr. 343 (fol. 454r-v).

Clarissimo viro, Doctrina virtuteque nobili, D. Ioanni CRATONI à Crafthaim, Caesareae Maiestati à consilijs et medico intimo etc. Domino et amico suo colendo.¹

S. Imprudentius me fecisse fateor, qui doctoratum expetierim sine ceremonijs tanquam haereditatem sine parentalibus. Quod cum fieri non posse viderim: et quantum benignitati tuae debeam, nihilo minus agnosco, et sortem meam aequi bonique facio, resque meas diuinae prouidentiae committo, quae me, vti confido, in extremo fabulae vitae meae actu non destituet. Titulum autem istum fraude intercipere, quod suspicari videris, nunquam in animo habui. Nam quod tuam Excellentiam doctoris titulum mihi decreuisse scripsi, de voluntate tua, non de euentu locutus sum. Sic mihi D. Hainzelius ante annos amplius 8 locupletem viduam decreuit, cum ego nihilo minus caelebs viuam. Illud quidem fateor, cum me à Cal[endis] Augusti superioris anni doctorem literis tuis humanissimis appellasses, me inscriptioni Demosthenici operis addidisse: autoritate Caesarea philosophiae doctore: sed scripsi typographo, vt ea verba deleret, et puto factum. Et nunc scribo D. Zwingero, si factum non sit, vt curet, vt fiat. Neque ego de honore labore, modò sit vnde honestè viuam: quam ad rem hic nullis insignibus est opus. Sin hinc pulsus fuero, aliam iniui rationem, vt, vendita bibliotheca mea, viaticum, vti spero, 600 f. mihi suppetat apud Argentinensem rempublicam. Quae me fortassis etiam sine titulo in schola suo loco aliquo esse patietur. Aduentum E. T. ad nos vtinam bene fortunet Deus: non vt me ornes, sed vt eruditis et humanis tuis colloquijs frui liceat. Vale. Augustae Vindelicorum. Cal[endis] Februarij Anno 1570.

Hiero[nymus] Wolfius.

¹Darunter von anderer Hand: An der Röm: Kay: Mt: hoff.